

“PERFECT INSURANCE” АЖ СТ

Ягона акциядорининг

2022 йил 20 - 05 даги 11 -сонли

қарори билан

“ТАСДИҚЛАНГАН”



“PERFECT INSURANCE” АЖ СУҒУРТА ТАШКИЛОТИ АКЦИЯДОРЛАР УМУМИЙ ЙИҒИЛИШИ ТЎҒРИСИДА Н И З О М

ТОШКЕНТ-2022

I бўлим. Умумий қоидалар

1.1. Ушбу низом Ўзбекистон Республикаси “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Қонуни, “PERFECT INSURANCE” АЖ Суғурта ташкилоти (матн давомида Ташкилот деб юритилади) уставига мувофиқ ишлаб чиқилган ва Ташкилот акциядорларининг умумий йиғилиши мавқеини белгилайди, унинг ишини, ўтказиш ва қарорлар қабул қилинишини тартибга солади.

1.2. Ташкилот ҳар йили акциядорларнинг йиллик умумий йиғилишини ўтказиши шарт.

1.3. Акциядорларнинг йиллик умумий йиғилиши молия йили тугаганидан кейин олти ойдан кечиктирмай ўтказилади. Одатда акциядорларнинг йиллик умумий йиғилиши апрель-июнь ойларида ўтказилади. Акциядорларнинг йиллик умумий йиғилишида Ташкилотнинг Кузатув кенгашини сайлаш тўғрисидаги масалалар ҳал этилади, шунингдек қонун ҳужжатлари ва Ташкилот уставига мувофиқ Ташкилотнинг йиллик ҳисоботи, Ташкилот Бош директори ва Кузатув кенгашининг Ташкилотни ривожлантириш стратегиясига эришиш бўйича кўрилатган чора-тадбирлар тўғрисидаги ҳисоботлари ва бошқа ҳужжатлари кўриб чиқилади.

1.4. Акциядорларнинг йиллик умумий йиғилишидан ташқари ўтказиладиган умумий йиғилишлари навбатдан ташқари йиғилишлардир.

1.5. Акциядорларнинг умумий йиғилишини ўтказиш санаси ва тартиби, йиғилиш ўтказилиши ҳақида акциядорларга хабар бериш тартиби, акциядорларнинг умумий йиғилишини ўтказишга тайёргарлик вақтида акциядорларга бериладиган материалларнинг (ахборотнинг) рўйхати Ташкилотнинг Кузатув кенгаши томонидан белгиланади.

II бўлим. Акциядорлар умумий йиғилишининг ваколатлари ва қарорларни қабул қилиш

2.1. Акциядорлар умумий йиғилишининг ваколат доирасига қуйидагилар киради:

2.1.1. Ташкилот уставига ўзгартириш ва қўшимчалар киритиш ёки Ташкилотнинг янги таҳрирдаги уставини тасдиқлаш;

2.1.2. Ташкилотни қайта ташкил этиш;

2.1.3. Ташкилотни тугатиш, тугатувчини (тугатиш комиссиясини) тайинлаш ҳамда оралиқ ва якуний тугатиш балансларини тасдиқлаш;

2.1.4. Ташкилот Кузатув кенгашининг сон таркибини белгилаш, уларнинг аъзоларини сайлаш ва аъзоларнинг ваколатларини муддатидан илгари тугатиш,

Кузатув кенгаши аъзоларига мукофот ва компенсациялар тўлаш, шунингдек Кузатув кенгаши тўғрисидаги низомни тасдиқлаш;

2.1.5. эълон қилинган акцияларнинг энг кўп миқдорини белгилаш;

2.1.6. Ташкилотнинг устав фондини (устав капиталини) кўпайтириш ва камайитириш;

2.1.7. ўз акцияларини олиш;

2.1.8. Ташкилотнинг ташкилий тузилмасини тасдиқлаш;

2.1.9. Ташкилот ижроия органини тузиш, унинг раҳбарини сайлаш (тайинлаш) ва раҳбарнинг ваколатларини муддатидан илгари тугатиш;

2.1.10. Ташкилотнинг йиллик ҳисоботини ва йиллик бизнес режасини, шунингдек Ташкилот фаолиятининг асосий йўналишлари ва мақсадидан келиб чиққан ҳолда Ташкилотни ўрта муддатга ва узоқ муддатга ривожлантиришнинг аниқ муддатлари белгиланган стратегиясини тасдиқлаш. Зарур ҳолларда Ташкилотнинг тасдиқланган ривожлантириш стратегияларига ўзгартириш ва қўшимчалар киритиш;

2.1.11. Ташкилотнинг фойдаси ва зарарларини тақсимлаш;

2.1.12. Ташкилот Кузатув кенгашининг ўз ваколат доирасига кирадиган масалалар юзасидан, шу жумладан Ташкилотни бошқаришга доир қонун ҳужжатларида белгиланган талабларга риоя этилиши юзасидан Ташкилот Кузатув кенгашининг ҳисоботларини эшитиш;

2.1.13. Ташкилот томонидан корпоратив облигациялар, шу жумладан акцияларга айирбошладиган облигациялар чиқариш тўғрисида қарор қабул қилиш;

2.1.14. Ташкилотнинг корпоратив облигацияларини қайтариб сотиб олиш тўғрисида қарор қабул қилиш;

2.1.15. Қонунчиликка мувофиқ акцияларни жойлаштириш нархини белгилаш;

2.1.16. мажбурий аудиторлик текширувини ўтказиш учун аудиторлик ташкилотини белгилаш, ушбу ташкилотнинг хизматларига тўланадиган энг кўп ҳақ миқдори ва у билан шартнома тузиш (шартномани бекор қилиш) тўғрисида қарор қабул қилиш;

2.1.17. акциядорлар умумий йиғилишининг регламентини тасдиқлаш;

2.1.18. акцияларни майдалаш ва йириклаштириш;

2.1.19. Ташкилот Бош директориға тўланадиган ҳақ ва (ёки) компенсацияларни энг юқори миқдорларини белгилаш;

2.1.20. Ўзбекистон Республикаси “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Қонунининг 8 ва 9-бобларида назарда тутилган ҳолларда Ташкилот томонидан битимлар тузиш тўғрисида қарор қабул қилиш;

2.1.21. Ташкилотнинг кундалик хўжалик фаоляти билан боғлиқ битимларни аниқлаш;

2.1.22. хайрия (хомийлик) ёки беғараз ёрдамни энг кўп миқдорларини белгилаш;

2.1.23. мустақил профессионал ташкилотлар – маслаҳатчиларни жалб қилган ҳолда бизнес жараёнлар ва лойиҳалар Ташкилотнинг ривожланиш мақсадларига мувофиқлиги ҳар йиллик таҳлилни ўтказиш тўғрисида қарор қабул қилиш;

2.1.24. ички назорат, дивиденд сиёсати, манфаатлар қарама-қаршилиги вақтида ҳаракат қилиш тартиби тўғрисидаги низомларни тасдиқлаш;

2.1.25. қонун ҳужжатларига, Ташкилот уставига ва мазкур Низомга мувофиқ бошқа масалаларни ҳал этиш.

2.2. Акциядорлар умумий йиғилишининг ваколат доирасига киритилган масалалар Ташкилотнинг Бош директориға ҳал қилиши учун берилиши мумкин эмас.

2.3. Акциядорлар умумий йиғилишининг ваколат доирасига киритилган масалалар Ташкилотнинг Кузатув кенгашиға ҳал қилиши учун берилиши мумкин эмас, қонун ҳужжатлари ва Ташкилот уставида назардатутилган ҳолатлар бундан мустасно.

2.4. Ушбу Низомда кўрсатилган масалалар бўйича қарорлар акциядорлар умумий йиғилиши томонидан акциядорларнинг умумий йиғилишида иштирок этаётган овоз берувчи акцияларнинг эгалари бўлган акциядорларнинг тўртдан уч қисмидан иборат кўпчилик (малакали кўпчилик) овози билан қабул қилинади. Солиққа оид ёки давлат олдидаги бошқа қарздорлик ҳисобига Ташкилот устав фондидаги (устав капиталидаги) давлат улушини шакллантириш ёки ошириш тўғрисидаги қарор Ташкилот акциядорлари умумий йиғилиши томонидан Ташкилотнинг жойлаштирилган овоз берувчи акцияларининг камида учдан икки қисми эгалари бўлган акциядорларнинг (давлатдан ташқари) розилиги мавжуд бўлган тақдирда, акциядорларнинг оддий кўпчилик овози билан қабул қилинади.

2.5. Овозга қўйилган қолган масалалар бўйича акциядорлар умумий йиғилишининг қарорлари, агар қонун ҳужжатларида ва Ташкилотнинг уставида бошқача қоида белгиланмаган бўлса, Ташкилотнинг овоз берувчи акциялари эгалари бўлган, йиғилишда иштирок этаётган акциядорларнинг кўпчилик (оддий кўпчилик) овози билан қабул қилинади.

2.6. Акциядорларнинг умумий йиғилишида овоз бериш “Ташкилотнинг овоз берувчи битта акцияси — битта овоз” принципи бўйича амалга оширилади, Ташкилотнинг Кузатув кенгаши аъзоларини сайлаш бўйича кумулятив овоз беришни ўтказиш ҳоллари бундан мустасно.

2.7. Акциядорларнинг умумий йиғилишида кун тартиби масалалари бўйича овоз бериш овоз бериш бюллетенлари орқали амалга оширилади.

2.8. Овоз берилганида овоз берувчи қайси масала бўйича эҳтимол тутилган овоз бериш вариантларидан фақат биттасини қолдирган бўлса, ўша масала бўйича берилган овозлар ҳисобга олинади. Мазкур талабни бузган ҳолда тўлдирилган овоз бериш бюллетенлари ҳақиқий эмас деб топилади ва улардаги масалалар бўйича берилган овозлар ҳисобга олинмайди. Агар овоз бериш бюллетенида овозга қўйилган бир нечта масала кўрсатилган бўлса, бир ёки бир нечта масалага нисбатан мазкур банднинг биринчи хатбошида кўрсатилган талабга риоя этилмаганлиги бюллетеннинг умуман ҳақиқий эмас деб топилишига сабаб бўлмайди.

2.9. Акциядор ёки унинг вакилининг ёзма талабига асосан Ташкилот у томонидан тўлдирилган овоз бериш бюллетени нусхасини тақдим этиши шарт.

2.10. Акциядорларнинг умумий йиғилишида қатнашиш имкони бўлмаган акциядор, шу жумладан видеоконференцалоқа орқали, акциядорларнинг умумий йиғилиши ўтказилиш санасига қадар 1 иш кунидан кечиктирмай Ташкилотнинг электрон манзилига у томонидан тўлдирилган ва унинг электрон рақамли имзоси билан тасдиқланган бюллетеннинг электрон вариантини юборишга ҳақли. Акциядорлар умумий йиғилишида видеоконференцалоқа орқали қатнашаётган акциядор у томонидан тўлдирилган ва унинг электрон рақамли имзоси билан тасдиқланган бюллетеннинг электрон вариантини акциядорлар умумий йиғилиши тугаганидан сўнг 1 иш куни давомида Ташкилотнинг электрон манзилига юбориши шарт. Бунда Ташкилот бюллетеннинг электрон вариантдан фойдаланиш учун акциядор олдиндан қонун ҳужжатларида белгиланган талабларга мувофиқ электрон рақамли имзони ҳаққонийлигини текшириш имкониятини таъминлаши шарт. Овоз бериш бюллетени акциядор томонидан ўз вақтида тақдим этилмаган ҳолда бундай бюллетенлар бўйича овозлар ҳисобга олинмайди.

2.11. Ташкилотнинг акциядорлари, шу жумладан миноритар акциядорлар, овоз беришда ўзларининг умумий фикрини (позициясини) шакллантириш учун акциядорлик битим тузишга ҳақли.

2.12. Акциялар билан тақдим қилинадиган ҳуқуқларни амалга ошириш ва (ёки) акцияларга бўлган ҳуқуқларни амалга ошириш хусусиятлари бўйича шартнома акциядорлик битим деб эътироф этилади.

2.13. Акциядорлик битимни тузиш, бекор қилиш ва шартларига риоя қилиш, шунингдек ушбу битим бўйича томонларнинг ҳуқуқлари, мажбуриятлари ва муносабатлари Ўзбекистон Республикаси қонун ҳужжатлари билан тартибга солинади.

III бўлим. Акциядорлар умумий йиғилишида қатнашиш ҳуқуқи. Акциядорларни ва уларнинг ваколатли вакиллари рўйхатдан ўтказиш

3.1. Акциядорларнинг умумий йиғилишида иштирок этиш ҳуқуқига акциядорларнинг умумий йиғилиши ўтказиладиган санадан уч иш кuni олдин шакллантирилган Ташкилот акциядорларининг реестрида қайд этилган акциядорлар эга бўлади.

3.2. Ташкилот акциядорнинг талабига кўра акциядорга у акциядорлар умумий йиғилишини ўтказиш учун шакллантирилган Ташкилот акциядорларининг реестрига киритилганлиги тўғрисида ахборот тақдим этиши шарт.

3.3. Ташкилот акциядорларининг реестрига ўзгартиш ва қўшимчалар киритилишига йўл қўйилмайди, мазкур реестр шакллантирилган санада унга киритилмай қолган шахсларнинг бузилган ҳуқуқлари тикланган ёки реестрни шакллантиришда йўл қўйилган хатолар тузатилган ҳоллар бундан мустасно.

3.4. Акциядорлар умумий йиғилишида Ташкилот акциядорлари реестрида қайд этилган акциядорлар, уларнинг ваколатли вакиллари, Ташкилот аудитори, Кузатув кенгаши ва Бош директор ҳозир бўлиш ҳуқуқига эгадир. Ташкилот Кузатув кенгаши ҳамда Бош директор лавозимига номзодлар ўзларининг номзодлари кўриб чиқиляётганда акциядорлар умумий йиғилишида қатнашишлари мумкин.

3.5. Умумий йиғилишда қатнашиш учун акциядорлар ёки уларнинг ваколатли вакиллари йиғилиш тўғрисидаги билдиришномада кўрсатилган жой ва вақт бўйича рўйхатдан ўтишлари керак. Акциядорлар умумий йиғилишида акциядор шахсан қатнашиш имкони бўлмаган тақдирда ушбу акциядор акциядорлар умумий йиғилиши ўтказилиши тўғрисидаги билдиришномани олгандан сўнг видеоконференцалоқа тартибда акциядорлар умумий йиғилишида қатнашиш ва электрон почта орқали овоз бериш (электрон рақамли имзо билан тасдиқланган) ҳақида Ташкилотга талабнома юбориши мумкин.

3.6. Агар қонунчиликда ўзгача қоида белгиланмаган бўлса, акциядорнинг, шу жумладан акциядорлик битим тузган акциядорларнинг вакили акциядорлар умумий йиғилишида ёзма шаклда тузилган ишончнома асосида иш юритади. Овоз беришга доир ишончномада ваколат берган ва вакил қилинган шахс тўғрисидаги маълумотлар (исми-шарифи ёки номи, яшаш жойи ёки жойлашган ери, паспортига оид маълумотлар) бўлиши лозим. Жисмоний шахс номидан берилган овоз беришга доир ишончнома нотариал тартибда тасдиқланган бўлиши керак. Юридик шахс номидан овоз беришга доир ишончнома унинг раҳбарининг имзоси ва ушбу юридик шахснинг муҳри билан (муҳр мавжуд бўлган тақдирда) тасдиқланган ҳолда берилади.

3.7. Умумий йиғилишда қатнашиш учун келган жисмоний шахслар бўлган акциядорларни рўйхатдан ўтказиш паспорт ёки акциядорнинг шахсини тасдиқловчи бошқа ҳужжат кўрсатилгач, вакилга нисбатан эса нотариал тартибда тасдиқланган ишончнома кўрсатилгач амалга оширилади.

3.8. Ташкилот акциядори - юридик шахс раҳбари умумий йиғилишдаги ўз ваколатларини лавозимга тайинлаш тўғрисидаги ҳуқуқий ҳужжат ҳамда шахсни тасдиқловчи ҳужжат асосида амалга оширади.

3.9. Ташкилот акциядорининг - юридик шахснинг вакили акциядорлар умумий йиғилишида ушбу юридик шахс раҳбарининг имзоси ёки бунга таъсис ҳужжатлари билан вакил қилинган бошқа шахснинг имзоси ва юридик шахснинг муҳри билан тасдиқланган унинг номига берилган ишончнома мавжуд бўлган тақдирда қатнашиши мумкин.

3.10. Агар Ташкилотнинг акцияси бир нечта шахснинг умумий улушли мулкида бўлса, акциядорларнинг умумий йиғилишида овоз бериш ваколатлари уларнинг хоҳишига кўра умумий улушли мулк иштирокчиларидан бири ёки уларнинг умумий вакили томонидан амалга оширилади. Кўрсатиб ўтилган ҳар бир шахснинг ваколатлари тегишли тарзда расмийлаштирилган бўлиши керак.

3.11. Умумий йиғилишга келган акциядорларни рўйхатдан ўтказиш акциядорларнинг умумий йиғилишини ўтказиш учун шакллантирилган Ташкилот акциядорлари реестрига биноан мазкур низомнинг 1 - иловасида келтирилган шакл бўйича қайд этиш рўйхати тузилади. Қайд этиш рўйхати жузланган, тартиб рақами қўйилган, ип ўтказиб тикилган ва Ташкилот муҳри билан тасдиқланган бўлиши керак.

3.12. Умумий йиғилишга келган акциядорларни рўйхатдан ўтказиш даврида акциядорлар (уларнинг вакиллари) қайд этиш рўйхатига имзо чекадилар ва овоз бериш учун бюллетенлар тўпламини оладилар (бюллетен намунаси 2 - илова). Мазкур Низомнинг 2.10. бандида белгиланган ҳолатларда акциядорларни рўйхатдан ўтказиш санок комиссияси томонидан қайд этиш рўйхатига тегишли ёзувларни киритиш йўли билан амалга оширилади.

3.13. Агар йиғилиш қатнашчиси бир ёки бир неча акциядорнинг манфаатларини ифодалашга ишончнома тақдим этса, у ҳолда унга у ифодалаётган акциядор (акциядорлар) учун овоз беришга бюллетен берилади, рўйхатдан ўтиш рўйхатида эса у ифодалаётган акциядорнинг фамилияси қаршисига «_____та (сони) овоз берувчи акциялар бўйича «_____» да берилган ишончнома бўйича» деган ёзув қайд этилади ҳамда вакилнинг фамилияси, исми, отасининг исми кўрсатилади.

IV бўлим. Акциядорлар йиллик умумий йиғилишини ўтказишга тайёргарлик кўриш

4.1. Акциядорлар умумий йиғилишини ўтказишга тайёргарлик кўриляётганда Кузатув кенгаши қуйидагиларни белгилайди:

- умумий йиғилиш ўтказиладиган сана, вақт ва жойни;

- умумий йиғилишнинг кун тартибини;
- умумий йиғилиш ўтказиш учун Ташкилот акциядорларининг реестри шакллантириладиган санани;
- умумий йиғилиш ўтказилиши ҳақида акциядорларга ва давлат вакилига хабар қилиш тартибини;
- умумий йиғилишни ўтказишга тайёргарлик кўрилаётганда акциядорларга ва давлат вакилига тақдим этиладиган ахборот (материаллар) рўйхатини;
- овоз бериш бюллетенининг шакли ва матнини.

4.2. Акциядорларнинг умумий йиғилиши ўтказиладиган сана уни ўтказиш тўғрисида қарор қабул қилинган кундан эътиборан ўн кундан кам ва ўттиз кундан кўп этиб белгиланиши мумкин эмас.

4.3. Акциядорларнинг умумий йиғилишини ўтказиш тўғрисидаги хабар (хабарнома намунаси 3 - илова) акциядорларнинг умумий йиғилиши ўтказиладиган санадан камида йигирма бир кундан кечиктирмай, лекин узоғи билан ўттиз кун олдин Ташкилотнинг расмий веб-сайтида, Корпоратив ахборотнинг ягона порталида ва оммавий ахборот воситаларида эълон қилинади, шунингдек акциядорларга электрон почта орқали юборилади. Ташкилот давлат вакилини акциядорларнинг умумий йиғилиши ўтказиладиган санадан камида йигирма биркун олдин ёзма шаклда хабардор қилиши шарт.

4.4. Акциядорларнинг умумий йиғилишини ўтказиш тўғрисидаги хабарда қуйидагилар кўрсатилиши керак:

- Ташкилотнинг номи, жойлашган ери (почта манзили) ва электрон почта манзили;
- умумий йиғилиш ўтказиладиган сана, вақт ва жой;
- Ташкилот акциядорларининг реестри шакллантириладиган сана;
- умумий йиғилиш кун тартибига киритилган масалалар;
- умумий йиғилишни ўтказишга тайёргарлик кўрилаётганда акциядорларга тақдим этилиши лозим бўлган ахборот (материаллар) билан акциядорларни таништириш тартиби.

4.5. Акциядорлар умумий йиғилишини ўтказишга тайёргарлик кўрилаётганда акциядорларга тақдим этилиши лозим бўлган ахборотга (материалларга) Ташкилотнинг йиллик ҳисоботи, Ташкилотнинг йиллик молия-хўжалик фаолиятини текшириш натижалари юзасидан Ташкилот аудиторлик ташкилотининг хулосаси, Ташкилотнинг Кузатув кенгаши аъзолигига номзодлар тўғрисидаги маълумотлар, Ташкилотнинг уставига киритиладиган ўзгартириш ва қўшимчалар лойиҳаси ёки Ташкилотнинг янги таҳрирдаги устави лойиҳаси, шунингдек Кузатув кенгашининг акциядорлар умумий йиғилиши кун тартиби бўйича муносабати киради. Акциядорларнинг умумий йиғилишини ўтказишга тайёргарлик кўрилаётганда акциядорларга тақдим этилиши мажбурий бўлган

қўшимча ахборотнинг (материалларнинг) рўйхати қимматли қоғозлар бозорини тартибга солиш бўйича ваколатли давлат органи томонидан белгиланиши мумкин.

4.6. Ташкилот овоз берувчи акцияларининг ҳаммаси бўлиб камида бир фоизига эгалик қилувчи акциядорлар (акциядор) Ташкилотнинг молия йили тугаганидан кейин 15 февралдан кечиктирмай акциядорларнинг йиллик умумий йиғилиши кун тартибига масалалар, фойдани тақсимлаш бўйича таклифлар киритишга ҳамда Ташкилот Кузатув кенгашига бу органнинг миқдор таркибидан ошмайдиган тарзда номзодлар кўрсатишга ҳақли.

4.7. Акциядорлар умумий йиғилишининг кун тартибига масала уни қўйиш сабаблари, масалани киритаётган акциядорларнинг (акциядорнинг) исми-шарифи (номи), уларга тегишли акцияларнинг сони ва тури кўрсатилган ҳолда ёзма шаклда киритилади. Ташкилот Кузатув кенгашига номзодлар кўрсатиш тўғрисида таклифлар киритилганда, шу жумладан ўзини ўзи номзод қилиб кўрсатилган тақдирда номзоднинг исми-шарифи, унга тегишли акцияларнинг сони ва тури (агар номзод Ташкилот акциядори бўлса), шунингдек номзодни кўрсатаётган акциядорларнинг исми-шарифи (номи), уларга тегишли акцияларнинг сони ва тури кўрсатилади.

4.8. Ташкилотнинг Кузатув кенгаши тушган таклифларни кўриб чиқиши ҳамда мазкур низомнинг 4.6. бандида белгиланган муддат тугаганидан сўнг ўн кундан кечиктирмай уларни акциядорларнинг умумий йиғилиши кун тартибига киритиш тўғрисида ёки мазкур кун тартибига киритишни рад этиш ҳақида қарор қабул қилиши шарт.

4.9. Акциядорлар (акциядор) томонидан киритилган масала акциядорлар умумий йиғилишининг кун тартибига, худди шунингдек кўрсатилган номзодлар Ташкилотнинг Кузатув кенгашига сайлов бўйича овоз бериш учун номзодлар рўйхатига киритилиши керак, қуйидаги ҳоллар бундан мустасно:

- ушбу низомнинг 4.6. бандида белгиланган муддатга акциядорлар (акциядор) томонидан риоя этилмаган бўлса;
- акциядорлар (акциядор) ушбу низомни 4.6. бандида назарда тутилган миқдордаги овоз берувчи Ташкилот акцияларининг эгаси бўлмаса;
- агар таклифдаги маълумотлар тўлиқ бўлмаса;
- таклифлар қонун ҳужжатлари талабларига мувофиқ бўлмаса.

4.10. Акциядорлар (акциядор) Ташкилот Кузатув кенгашига ўзлари кўрсатган номзодлар рўйхатига акциядорларнинг йиллик умумий йиғилиши ўтказилиши тўғрисидаги хабар эълон қилинган санадан эътиборан уч иш кунидан кечиктирмай ўзгартиришлар киритишга ҳақли.

4.11. Ташкилот Кузатув кенгашининг масалани акциядорлар умумий йиғилишининг кун тартибига ёки номзодни Ташкилот Кузатув кенгашига сайлов бўйича овоз бериш учун номзодлар рўйхатига киритишни рад этиш тўғрисидаги

асослантирилган қарори масалани киритган ёки таклиф тақдим этган акциядорларга (акциядорга) қарор қабул қилинган кундан эътиборан уч иш кунидан кечиктирмай юборилади.

4.12. Ташкилот Кузатув кенгашининг масалани акциядорлар умумий йиғилишининг кун тартибига ёки номзодни Ташкилот Кузатув кенгашига сайлов бўйича овоз бериш учун номзодлар рўйхатига киритишни рад этиш тўғрисидаги қарори устидан судга шикоят қилиниши мумкин.

V бўлим. Акциядорларнинг навбатдан ташқари умумий йиғилишини ўтказишга тайёргарлик кўриш

5.1. Акциядорларнинг навбатдан ташқари умумий йиғилиши Ташкилот Кузатув кенгашининг қарорига кўра:

- унинг ўз ташаббуси асосида;

- ёзма талаб тақдим этилган санада Ташкилот овоз берувчи акцияларининг камида 5%га эгалик қилувчи акциядорнинг (акциядорларнинг) ёзма талаби (талабнинг намунаси 5 илова) асосида ўтказилади. Ташкилот овоз берувчи акцияларининг камида 5%га эгалик қилувчи акциядорнинг (акциядорларнинг) ёзма талабига кўра акциядорларнинг навбатдан ташқари умумий йиғилишини чақириш акциядорларнинг навбатдан ташқари умумий йиғилишини ўтказиш ҳақида ёзма талаб тақдим этилган кундан эътиборан ўттиз кундан кечиктирмай Ташкилотнинг Кузатув кенгаши томонидан амалга оширилади.

5.2. Акциядорларнинг навбатдан ташқари умумий йиғилишини ўтказиш тўғрисидаги талабда йиғилиш кун тартибига киритилиши керак бўлган масалалар уларни киритиш сабаблари кўрсатилган ҳолда таърифланган бўлиши керак. Агар навбатдан ташқари акциядорлар умумий йиғилишини чақириш Кузатув кенгаши аъзолари ваколатларини муддатидан илгари тугатиш ҳолати билан боғлиқ бўлса, бундай йиғилишни чақириш тўғрисидаги талабномада Кузатув кенгаши аъзолари ваколатларини муддатидан илгари тугатиш бўйича масалалардан ташқари кун тартибида Кузатув кенгашининг янги таркибини сайлаш бўйича таклифлар бўлиши шарт.

5.3. Ташкилотнинг Кузатув кенгаши Ташкилот овоз берувчи акцияларининг камида 5%га эгалик қилувчи акциядорнинг (акциядорларнинг) талабига кўра чақириладиган акциядорларнинг навбатдан ташқари умумий йиғилиши кун тартибидаги масалаларнинг таърифига ўзгартиришлар киритишга ҳақли эмас.

5.4. Акциядорларнинг навбатдан ташқари умумий йиғилишини чақириш тўғрисидаги талаб акциядордан (акциядорлардан) чиққан тақдирда, бу талабда умумий йиғилишни чақиришни талаб қилаётган акциядорнинг (акциядорларнинг) исмишарифи (номи), унга тегишли акцияларнинг сони, тури кўрсатилган бўлиши лозим.

5.5. Акциядорларнинг навбатдан ташқари умумий йиғилишини чақириш тўғрисидаги талаб акциядорларнинг навбатдан ташқари умумий йиғилишини чақиришни талаб қилган шахс (шахслар) томонидан имзоланади.

5.6. Ташкилотнинг овоз берувчи акцияларининг камида 5%га эгалик қилувчи акциядор (акциядорлар) акциядорлар навбатдан ташқари умумий йиғилишини чақириш тўғрисида талаб тақдим этган санадан эътиборан 10 кун ичида Ташкилот Кузатув кенгаши акциядорлар навбатдан ташқари умумий йиғилишини чақириш тўғрисида ёки йиғилишни чақиришни рад этиш ҳақида қарор қабул қилиши керак.

5.7. Ташкилот овоз берувчи акцияларининг камида 5%га эгалик қилувчи акциядорнинг (акциядорларнинг) талабига кўра акциядорларнинг навбатдан ташқари умумий йиғилишини чақиришни рад этиш тўғрисидаги қарор қуйидаги ҳолларда қабул қилиниши мумкин, агар:

- акциядорларнинг навбатдан ташқари умумий йиғилишини чақиришни талаб қилаётган акциядор (акциядорлар) ушбу банднинг биринчи хатбошида назарда тутилган миқдордаги Ташкилот овоз берувчи акцияларининг эгаси бўлмаса;

- кун тартибига киритиш учун таклиф этилган масалалардан бирортаси ҳам акциядорлар умумий йиғилишининг ваколат доирасига кирмаса;

- кун тартибига киритиш учун таклиф этилган масала қонун ҳужжатлари талабларига мувофиқ бўлмаса.

5.8. Акциядорлар навбатдан ташқари умумий йиғилишини чақириш тўғрисидаги Кузатув кенгашининг қарори ёки бундай йиғилишни чақиришни рад этиш ҳақидаги асослантирилган қарори йиғилиш чақиришни талаб қилган шахсларга қарор қабул қилинган пайтдан эътиборан 3 иш кунидан кечиктирмай юборилади.

5.9. Акциядорларнинг навбатдан ташқари умумий йиғилишини чақиришни рад этиш тўғрисидаги Ташкилот Кузатув кенгашининг қарори устидан судга шикоят қилиниши мумкин.

5.10. Ташкилот Кузатув кенгаши ушбу низомнинг 5.6. бандида белгиланган муддат ичида акциядорларнинг навбатдан ташқари умумий йиғилишини чақириш тўғрисида қарор қабул қилмаган тақдирда ёки уни чақиришни рад этиш ҳақида қарор қабул қилган тақдирда, акциядорларнинг навбатдан ташқари умумий йиғилиши уни чақиришни талаб қилган шахслар томонидан чақирилиши мумкин. Бундай ҳолларда акциядорларнинг умумий йиғилишига тайёргарлик кўриш ва уни ўтказиш билан боғлиқ харажатларнинг ўрни акциядорлар умумий йиғилишининг қарорига кўра Ташкилотнинг маблағлари ҳисобидан қопланиши мумкин.

5.11. Мазкур низомда белгиланган тартибда акциядорларнинг навбатдан ташқари умумий йиғилишини Кузатув кенгаши, ёхуд акциядорлар умумий йиғилишини чақирувчи қонун ҳужжатларида белгиланган ҳолатлардаги шахслар ўтказишга тайёргарликни кўради.

VI бўлим. Акциядорлар умумий йиғилиши кворуми

6.1. Агар акциядорларнинг умумий йиғилишида иштирок этиш учун рўйхатдан ўтказиш тугалланган пайтда Ташкилотнинг жойлаштирилган овоз берувчи акцияларининг жами 50%дан кўпроқ овозига эга бўлган акциядорлар (уларнинг вакиллари) рўйхатдан ўтган бўлса, акциядорларнинг умумий йиғилиши ваколатли (кворумга эга) бўлади.

6.2. Имтиёзли акциялар кун тартибининг бир ёки бир нечта масалалар бўйича овоз берган ҳолларда йиғилишнинг кворуми тақдим этилган оддий акциялардан аниқланади, кўрсатиб ўтилган масалалар бўйича овозлар ҳисобланиши эса жами овоз берувчи оддий ва имтиёзли акциялардан амалга оширилади.

6.3. Кворум ҳисоблашда мазкур Низомнинг 2.10. бандида белгиланган тартибга мувофиқ акциядорларнинг умумий йиғилишида қатнашаётган акциядорларнинг овоз берувчи акциялари ҳам ҳисобга олинади.

6.4. Агар акциядорларнинг умумий йиғилиши бошланишининг белгиланган вақтига кворум бўлмаса акциядорларнинг такрорий умумий йиғилишини ўтказиш санаси эълон қилинади. Акциядорларнинг такрорий умумий йиғилишини ўтказишда кун тартибини ўзгартиришга йўл қўйилмайди.

6.5. Агар акциядорларнинг ўтказилмай қолган йиғилиши ўрнига чақирилган такрорий умумий йиғилишида иштирок этиш учун рўйхатдан ўтказиш тугалланган пайтда Ташкилотнинг жойлаштирилган овоз берувчи акцияларининг жами 40%дан кўпроқ овозига эга бўлган акциядорлар (уларнинг вакиллари) рўйхатдан ўтган бўлса, акциядорларнинг такрорий умумий йиғилиши ваколатли бўлади. Акциядорларнинг такрорий умумий йиғилишини ўтказиш тўғрисида хабар ушбу низомда назарда тутилган тартибда, шаклда ва муддатларда амалга оширилади.

6.6. Агар такрорий умумий йиғилишда кворум бўлмаса, бунда акциядорларнинг ташаббуси билан чақирилган йиғилиш амалга ошмаган деб ҳисобланади ва бошқа чақирилмайди. Кузатув кенгаши ташаббуси билан чақирилган йиғилиш эса кворум таъминланмаганича чақирилади.

6.7. Кворум бўлмаганлиги сабабли акциядорларнинг умумий йиғилишини ўтказиш санаси 20 кундан кам муддатга кўчирилган тақдирда, умумий йиғилишда иштирок этиш ҳуқуқига эга бўлган акциядорлар ўтказилмай қолган умумий йиғилишда иштирок этиш ҳуқуқига эга бўлган акциядорларнинг реестрига мувофиқ аниқланади.

VII бўлим. Акциядорлар умумий йиғилишнинг ишчи органлари

7.1. Қуйидагилар умумий йиғилиш ишчи органлари ҳисобланади: раёсат, санок комиссияси, котиб (котибият).

7.2. Акциядорлар умумий йиғилиши раёсати ва раиси акциядорлар умумий йиғилишида сайланади. Акциядорларнинг умумий йиғилишини Ташкилот Кузатув кенгашининг раиси, у узрли сабабларга кўра бўлмаган тақдирда эса, Ташкилот Кузатув кенгашининг аъзоларидан бири олиб боради.

7.3. Акциядорлар умумий йиғилиши раиси йиғилиш раёсатига бошчилик қилади, йиғилиш олиб борилишини таъминлайди ва ўз вазифаларини бажариш учун зарур бўлган барча ваколатларга эга бўлади.

7.4. Умумий йиғилиш раиси йиғилиш ўтишига раҳбарлик қилади, ишчи органлари ишини мувофиқлаштиради, масалаларни муҳокама қилиш тартибини белгилайди, маърузачиларнинг нутқ сўзлашлари вақтини чегаралайди, йиғилишни олиб бориш ва овоз бериш давомида тушунтиришлар беради, залда тартиб ўрнатилишини назорат қилади. Умумий йиғилиш раиси акциядорларнинг умумий йиғилишини аудио-видео тасмага ёзиб олиш ва Интернет тармоғида трансляция қилиш масалаларни рухсат бериш (санкция бериш) ҳуқуқига эга.

7.5. Овозларни санаб чиқиш, акциядорларнинг умумий йиғилишида иштирок этиши учун акциядорларни рўйхатга олиш, шунингдек овоз бериш бюллетенларини тарқатиш учун Ташкилот Кузатув кенгаши томонидан санок комиссияси тузилиб, унинг аъзолари сони ва шахсий таркиби акциядорларнинг умумий йиғилиши томонидан тасдиқланади.

7.6. Санок комиссиясининг таркиби камида уч кишидан иборат бўлиши керак. Санок комиссияси таркибига Ташкилот Кузатув кенгашининг аъзолари, Ташкилот Бош директори шунингдек ана шу лавозимларга номзоди кўрсатилган шахслар кириши мумкин эмас.

7.7. Бунда санок комиссиясига амалий ёрдам кўрсатиш ёки унинг функцияларини бажариш учун Ташкилот Кузатув кенгашининг қарорига асосан мустақил экспертлар (инвестицион маслаҳатчилар ва бошқа қимматли қоғозлар бозорининг профессионал иштирокчилари) жалб қилиниши мумкин.

7.8. Санок комиссияси унга юклатилган вазифаларни бажариш масаласида мустақил иш юритувчи йиғилишнинг доимий фаолият кўрсатадиган ишчи органи ҳисобланади ва Кузатув кенгаши таклифи асосида акциядорлар умумий йиғилиши томонидан сон ва шахсий таркиби тасдиқланади.

7.9. Санок комиссияси ваколатларининг муддати у акциядорлар умумий йиғилиши томонидан тасдиқланган пайтдан бошлаб акциядорларнинг тегишли йиғилиши (йиллик ёки навбатдан ташқари) томонидан санок комиссиясининг янги таркиби тасдиқланиши пайтигача амал қилади.

7.10. Акциядорлар умумий йиғилишини ўтказишга тайёргарлик кўриш пайтида саноқ комиссияси Кузатув кенгашининг топшириғига кўра қуйидаги функцияларини амалга оширади: - акциядорлар умумий йиғилишида қатнашиш ҳуқуқига эга бўлган акциядорлар рўйхатини тузади; - овоз бериш бюллетенларини ва умумий йиғилишнинг бошқа материалларини тарқатади (юборади), тарқатилган (юборилган) бюллетенлар ҳисобини олиб боради.

7.11. Акциядорлар умумий йиғилишида акциядорларнинг олдинги умумий йиғилиши томонидан сайланган саноқ комиссияси қуйидаги функцияларни амалга оширади:

- умумий йиғилишда қатнашиш учун акциядорларни (уларнинг вакилларини) рўйхатдан ўтказди;
- ишончномалар ва улар томонидан бериладиган ҳуқуқлар ҳисобини юритади;
- овоз бериш бюллетенларини ва умумий йиғилишнинг бошқа ахбороти (материаллари)ни тарқатади;
- акциядорлар умумий йиғилиши кворуми бор ёки йўқлигини аниқлайди.

7.12. Таркиби бўлиб ўтаётган акциядорлар умумий йиғилиши давомида тасдиқланган саноқ комиссияси:

- акциядорлар (уларнинг вакиллари) томонидан умумий йиғилишда овоз бериш ҳуқуқини амалга ошириш муносабати билан пайдо бўлувчи масалаларни тушунтиради;
- овоз беришга қўйилаётган масалалар бўйича овоз бериш тартибини тушунтиради;
- овоз беришнинг белгиланган тартибини ва акциядорларнинг овоз беришда қатнашиши ҳуқуқини таъминлайди;
- овозларни санайди ва овоз бериш якунларини чиқаради;
- овоз бериш якунлари тўғрисида баённома тузади;
- овоз бериш бюллетенларини архивга топширади.

7.13. Умумий йиғилиш котибиятининг сон ва шахсий таркиби акциядорлар умумий йиғилиши томонидан тасдиқланади.

7.14. Умумий йиғилиш котибияти (котиби):

- умумий йиғилишнинг боришини баёнга қайд этиб боради;
- ёзма буюртманомалар бўйича йиғилиш кун тартиби масалаларини муҳокама қилишда қатнашиш истагини билдирувчилар рўйхатини олиб боради;
- мазкур низомда назарда тутилган ҳолларда видеоконференцалоқани ёзиб олинишини таъминлайди;
- умумий йиғилиш тамом бўлгандан сўнг 10 кундан кечиктирмай акциядорлар умумий йиғилиши баёнини икки нусхада тузади.

VIII бўлим. Акциядорлар умумий йиғилишни олиб бориш тартиби

8.1. Акциядорлар умумий йиғилишини олиб бориш тартиби акциядорларнинг ҳар бир умумий йиғилишида мазкур низомга мувофиқ тасдиқланади.

8.2. Кузатув кенгаши раиси умумий йиғилишнинг раёсатини ва котибини, шунингдек зарур бўлган ҳолларда санок комиссиясини янги таркибини сайлашни таклиф этади.

8.3. Умумий йиғилишни олиб бориш тартиби йиғилишнинг бошланиши ва тахминан тамом бўлиш вақтини, нутқлар қанча давом этиши ва танаффусларни, кун тартиби масалаларининг изчиллигини, кун тартиби масалалари бўйича маърузачиларнинг фамилиялари ва лавозимларини, овоз беришни амалга ошириш ва унинг натижаларини эълон қилиш тартибини назарда тутати.

8.4. Акциядорлар умумий йиғилишида муҳокама қилинаётган масала бўйича йиғилишнинг ҳар бир қатнашчиси белгиланган вақт доирасида сўзга чиқиш ҳуқуқига эга. Ушбу ҳуқуқни таъминлаш акциядорлар умумий йиғилиши раисининг зиммасида бўлади.

8.5. Кун тартибидаги масалаларни муҳокама қилишда қатнашиш истагини билдирганлар умумий йиғилиш котибиятига муҳокама қилинадиган масалани кўрсатган ҳолда буюртманомга беришлари лозим.

8.6. Кун тартибининг барча масалалари муҳокама қилингандан кейин раис акциядорлар умумий йиғилишини ёпиқ деб эълон қилади.

IX бўлим. Акциядорлар умумий йиғилишининг баённомаси

9.1. Акциядорлар умумий йиғилишида баённома юритилади. Акциядорлар умумий йиғилишининг баённомаси акциядорларнинг умумий йиғилиши ёпилганидан кейин 10 кундан кечиктирмай икки нусхада тузилади.

9.2. Акциядорларнинг умумий йиғилиш баённомасининг ҳар иккала нусхаси умумий йиғилишда раислик қилувчи ва умумий йиғилиш котиби томонидан имзоланади.

9.3. Акциядорлар умумий йиғилишининг баённомасида:

- акциядорларнинг умумий йиғилиши ўтказилган сана, вақт ва жой;
- Ташкилотнинг овоз берувчи акцияларига эгалик қилувчи акциядорлар эга бўлган овозларнинг умумий сони;
- умумий йиғилишда иштирок этган акциядорлар эга бўлган овозларнинг сони;
- умумий йиғилишнинг раиси (раёсати) ва котиби (котибият), йиғилиш кун тартиби;

- маърузаларнинг асосий нутқлари, овозга қўйилган масалалар ҳамда улар юзасидан ўтказилган овоз бериш яқунлари, йиғилиш қабул қилган қарорлар кўрсатилади.

9.4. Санок комиссияси баёни йиғилишнинг махсус қарори билан тасдиқланмайди, балки маълумот учун қабул қилинади ҳамда умумий йиғилиш баённомасига қўшиб қўйилиши керак.

9.5. Акциядорлар умумий йиғилиши баёни имзолангандан сўнг санок комиссияси йиғилиш ҳужжатларини, шу жумладан умумий йиғилишнинг қайд этиш рўйхатини, санок комиссияси аъзолари томонидан муҳрланган овоз бериш бюллетенларини, овоз бериш яқунлари тўғрисидаги баённи ва акциядорлар умумий йиғилиши баённи сақлаш учун Ташкилот архивига топширади.

9.6. Акциядорларнинг умумий йиғилиши видеоконференцалоқа орқали ўтказилган ҳолларда йиғилиш баённомасига ушбу йиғилишнинг видео ёзуви шартли равишда илова қилинади.

Х бўлим. Акциядорлар умумий йиғилиши қарорларини бажариш

10.1. Акциядорларнинг умумий йиғилиши томонидан қабул қилинган қарорлар, шунингдек овоз бериш яқунлари акциядорлар эътиборига:

- акциядорлар умумий йиғилиши тугаганидан сўнг эълон қилиш;
- акциядорлар умумий йиғилиш баённомаси тузилган санадан 2 иш куни давомида муҳим факт тўғрисидаги маълумотларни ошкор қилиш йўллари билан етказилади. Агар Ташкилот акциялари фонд биржасининг листингига киритилган бўлса, Ташкилот фонд биржасининг расмий веб-сайтида тегишли ахборотни эълон қилиши шарт.

10.2. Ташкилот Бош директори акциядорлар умумий йиғилишининг қарорлари бажарилишини ташкиллаштиради.

10.3. Акциядорлар умумий йиғилиши қарорлари бажарилиши устидан назорат қилишни, башарти йиғилиш қарорида ўзгача ҳол қайд этилмаган ва баёнда акс эттирилмаган бўлса, Ташкилот Кузатув кенгаши амалга оширади.

10.4. Акциядорлар умумий йиғилишининг қарорлари умумий йиғилишда ҳозир бўлган, шунингдек ҳозир бўлмаган барча акциядорлар томонидан, уларга тегишли ва қонунчиликка зид бўлмаган қисми бўйича бажарилиши мажбурийдир.

XI бўлим. Яқуний қоидалар

11.1. Мазкур Низом акциядорлар умумий йиғилиши томонидан тасдиқланган кундан этиборан кучга киради.

11.2. Агар мазкур Низомни бирон бир қоидаси ўз кучини йўқотган бўлса, бу қоида бошқа қоидаларни тўхтатиш учун сабаб бўлмайди.

11.3. Агар Ўзбекистон Республикасининг қонунчилик ҳужжатлари ёхуд Компания уставида мазкур Низомда назарда тутилганидан бошқача қоидалар белгиланган бўлса, Ўзбекистон Республикасининг амалдаги қонунчилик ҳужжатлари ва Компания устави қоидалари қўлланилади.

ЖАМИ 107184 БЕТ



11.2. Агар маълум бўлган бўлса, бу
11.3. Агар Ўзбекистон Республикасида
Қўрашнинг ўзига яраша маълум бўлган бўлса,
Ўзбекистон Республикасида қўрашнинг
қўрашнинг ўзига яраша маълум бўлган бўлса